

**Sumiiffinni aalajangiiffissatut siunnersuutip tunngavilersuutaani ilanngussamilu nalunaarsorsimasuni qalorsuarsorluni aalisarnerup inerteqqutaalernissaa pillugu periarfissamik – taassumalu aningaasatigut kingunissai pillugit misissuinermik – Naalackersuisut Inatsisartunut agguasseqqullugit Inatsisartut aalajangiiffigisassaattut siunnersuut.**

(Inatsisartut ilaasortaq Nikolaj Jeremiassen, Siumut)

### **Akissuteqaat**

(Aalisarnermut, Piniarnermut Nunalerinermullu Naalackersuisoq)

### **Siullermeerneqarnera**

Piffimmi uuma siunnersuutip ilanngussartaani allassimasumi qalorsuarsorluni raajanik aalisarunnaarnissap aningaasatigut kingunerisinnaasaasa misissorneqarnissaanik Inatsisartunut ilaasortap hr. Nikolaj Jeremiassen-p siunnersuuteqarneranut qujavugut. Piffimmi titartarneqarsimasumi kangerluit arlallit ilaapput, soorlu siunnersuummi tunngavilersuutigineqartuni innersuussutigineqartoq. Taamaattumik ilimagineqarpoq siunnersuuteqartup kangerlunniunerusoq aalisarneq aarleqquteqarfigigaa.

Sinerissap qanittuani qalorsuarsorluni aalisarnermut tunngatillugu teknikkikkut atortorissaarutit pillugit Nalunaarummi, 17. november 2011-meersumi § 10, immikkoortoq 1 normu 3-mi inerteqqutaareerpoq qalorsuarsorluni saarullinniarneq, suluppaagarniarneq, nataarnarniarneq, qalerallinniarneq qeerarniarnerlu. Siunnersuuteqartup siunnersuummini tunngavilersuutigisai naapertorlugit sinerissap qanittuani aalisarneq pineqarunangilaq, qalorsuarsorlunili raajarniarneq pineqarnerulluni. Maannakkut sinerissap qanittuani qalorsuarsorluni aalisarnerup inerteqqutaaneranut qalorsuarsorluni raajarniarneq ilaangilaq. Taamaalillutik sinerissap qanittuani qalorsorlutik raajarniartut, qalorsorluni aalisarnermi inerteqqummut ilaangillat.

Kalaallit Nunaani Pinngortitaleriffiup tusarniaanermi akissuteqaammini paasissutissiissutigaa piffimmi pineqartumi aalisartoqartoq nalulluguli aalisarneq qanoq annertutiginersoq. Aalisartoqartoq oqaatigineqaannarpoq. Angallatit angallaviisa nalunaarsorneqarnerisa takutippaat piffimmi pineqartumi sinerissamut qanittumi aqquteqarunartoq ingerlaarfimmik kilisaatit sinerissap qanittuani aalisartut ingerlaarfigalugu aqqutigisartagaannik. Tamatuma takutippaa piffimmi pineqartumi sulerisoqartoq. Tusarniaanermi piffissarititaasup iluani piffimmi kilisaatit sineriassortut qanoq aalisartiginersut uppernarsivissallugu pisinnaasimangilaq. Kangerluit kisiisa qiviraanni, angalatit angalanerannik nalunaarsuutip takutippaa raajarniarluni aalisarneq annikitsuinnarmik ingerlanneqartoq. Kangerlunni qanoq aalisartigisoqarnerasoq paaseqqissaarniaraanni KANUAANA-p pisanik nalunaarsuiffiini misissuingaatsiartariaqassaaq.

Kalaallit Nunaani suliffiutillit tusarniaanermi akissuteqaamminni qalorsuarsorluni kangerlunni raajarniarnerup inerteqqutaanerata peqassutsimut iluaqutaasumik sunniuteqarnera takussutissaqartinngikkitsik nalunaarutigaa. Tamatumunnga ataatillugu Kalaallit Nunaanitsini suliffiutillit, pinngortitap misissorneqarneranit paasissutissat raajanik kinguaassiorqarneranik tikkuussinngineri innersuussutigaa. Tamanna tunngavigalugu Kalaallit Nunaani Suliffiutillit siunnersuut tapersersorsinnaanngilaat. Pinngortitaq, Avatangiisit aammalu Inatsiseqarnermut Naalackersuisoqarfik akissummini nalunaarutigaa pisuussutinik uumassusilinnik piujuaannartitsineq siunertaralugu atuneq iluaqutaasumik sunniuteqarnissaanik naliliisoqarpat misissuisoqarnissaa tapersersorumallugu. Aningaasaqarnermut Naalackersuisoqarfiup qalorsorluni raajarniarnerup inerteqqutaalernissaata peqassutsimut sunniuteqarnissaata nalilernissaa akisussaaffimmik avataaniittoq nalunaarutigaa.

Takussutissaqarsorinangilaq inerteqquteqarneq raajaqassutsimut iluaqutaassanngitsoq. Aamma biologit 2016-imut qanittukkut siunnersuineranni erserpoq Kalaallit Nunaata Kitaani raajat amerliartortut. Tusarniaanermi akissutigineqartut tunngavigalugit siunnersuut tapersersussallugu Naalackersuisut isumaqarput tunngavissaqanngitsoq.